

Pertemuan Pak Lah, Susilo Khamis

JAKARTA: Perdana Menteri, Datuk Seri Abdullah Ahmad Badawi dan Presiden Susilo Bambang Yudhoyono akan mengadakan pertemuan di Bukit Tinggi, Sumatera Barat pada Khamis dan Jumaat ini bagi meningkatkan lagi hubungan dua hala Malaysia-Indonesia.

Menteri Luar Indonesia, Hassan Wirajuda, berkata kedua-dua pemimpin berkenaan akan membincangkan usaha penyelesaian masalah di antara kedua-dua negara, terutama yang membabitkan pertikaian sempadan.

"Pada peringkat politik, Presiden Susilo dan Perdana Menteri akan mendorong rundingan penyelesaian masalah perbatasan secara lebih komprehensif," kata Hassan selepas bertemu Presiden Susilo di Pejabat Presiden di sini, semalam.

Rundingan yang masih dilakukan antara kedua-dua negara antara lain mengenai sempadan di sekitar Selat Melaka dan perairan Natuna di Laut China Selatan serta sempadan di perairan antara Selat Melaka dan Selat Singapura.

"Rundingan juga sedang kita lakukan untuk menentukan garis batas wilayah laut," kata Hassan yang dipetik laman web berita *Tempo Interaktif*. - Bernama